

JOSEPHI CALANDRELLI

IN COLLEGIO ROMANO MATHESEOS PROFESSORIS

E P I S T O L A

SUPRA FALLACIAM

GALILEANÆ DEMONSTRATIONIS

ACCELERATI MOTUS IN RATIONE SPATIORUM

Ad Virum Clarissimum, atque Nobilissimum

C O M I T E M

JORDANUM RICCATI



ROMÆ MDCCLXXIX.

EX OFFICINA SALOMONIANA

Præsidum Facultate.



RICCATI CLARISSIME .



Ratissimas jam tuas litteras acceperam, cum opusculorum Ferrariensium liber primus nuperrime editus in manus meas devenit . Legi inter alia opuscula epistolam clarissimi Joannis Andres ad virum nobilissimum, atque doctissimum Philippum Mariam Casalium conscriptam , in qua Galileanam demonstrationem circa motum acceleratum Dialogo tertio expositam ad examen revocat ; atque ipsam intergeometricas demonstrationes enumerandam esse putat . Tibi dudum perspectum esse scio, cl.fratrem tuum Vincentium Riccati Opusculo 111. Tom.2. Galileanam ipsam demonstrationem paralogismo laborantem existimasse ; quapropter pro tua humanitate veniam mihi daturum spero , si , per litteras , Fratris tui sententiam confirmare conabor ; demonstrando , neque Gassendum , neque Fermatium , neque clarissimum memoratæ epistolæ Auctorem , suis de-

monstrationibus Galileanam demonstrationem a paralogismo vindicare . Scribo ad te sine ulla cura ac verborum delectu , & dum tibi quod sentio aperio , quibus verbis id faciam non laboro .

Fuit ergo in ea quandoque opinione Galileus ; uti videre est in epistola ab ipsomet conscripta ; (Tom: 3. *Æ* lit. Patav. pag. 34.) spatia a mobili naturaliter deciduo percurfa esse in ratione velocitatum . Hanc sententiam post lapsum annorum fere triginta quatuor non modo immutavit, sed etiam hypothesim ipsam, celeritatum nempe crescentium in ratione spatiorum , impossibilem esse, demonstratione conficere putavit . Dialogo ergo tertio Tom: 3. *Æ*dit. Pat: pag. 95. Salviatum loquentem ita introducit . *Quando le velocità hanno la medesima proporzione , che gli spazj passati o da passarsi , tali spazj vengono passati in tempi eguali ; se dunque le velocità , colle quali il cadente passò lo spazio di quattro braccia , furon doppie delle velocità , colle quali passò le due prime braccia (siccome lo spazio è doppio dello spazio) adunque i tempi di tali passaggi sono eguali : ma passare il medesimo mobile le quattro braccia , e le due nell' istesso tempo , non può aver luogo , fuorchè nel moto istantaneo . Ma noi vediamo , che il grave cadente fa suo moto in tempo , e in minore passa la due braccia , che le quattro . Adunque è falso , che la velocità sua cresca come lo spazio ,*

Quid statim senserint Mathematici circa hanc Galileanam demonstrationem videre est ex epistola Cazrei
ad

ad Gassendum conscripta; in qua post expositam Galileanam demonstrationem ita Cazreus. *Proh tuam, mi Gassende, Philosophorumque omnium, ac Mathematicorum fidem! istud ne demonstrare est?* Verum Gassendus in responsione ad ipsum Cazreum, quæ habetur Tom. III. Opusculorum, non solum non putat paralogisticam Galilei demonstrationem: sed ipsius partes sumens, necessitatem motus instantanei, in hypothesi celeritatum crescentium in ratione spatiorum, adstruit. Duas ergo lineas supponit, quarum una in partes æquales duodecim sit divisa, altera in sex partes prioribus æquales; atque cum partes duodecim a corpore dupla velocitate, æquali tempore, motu uniformi conficiantur, ac partes sex ab alio corpore simplici velocitate: hinc concludit, duas has inequales lineas motu accelerato in data hypothesi percurri debere æquali tempore; ex eo quia tum motus uniformis, tum acceleratus in eo conveniant, quod ubique velocitas in linea duodecim partium dupla sit. *At in eo, inquit Gassendus, motus conveniunt, quod ubique velocitas per totam AC dupla sit velocitatis per totam DE (Fig: 1.).* Ex eo ergo quod tum AC, tum DE æquali tempore percurri debeant, concludit motum instantaneum per BC.

Facile fuit Cazreo Gassendo obijcere velocitatem per DE subduplam non esse velocitatis per primam medietatem AB, sed æqualem. Tunc ergo Gassendus ad puncta omni ologa linearum recurrens pristinam suam restauravit demonstrationem in secunda epistola ad Cazreum

in qua hæc habet. Nam necessitas quidem inferendi ex eo manifesta est, quod Acceleratio fieri, aut velocitas crescere non possit æquabiliter per totam AC , neque similiter per totam AB , quin, si velocitas in C dupla sit velocitatis in B , qualibet partes analogæ acceptæ per totam AC , duplæ sint ad analogas per totam AB : atque ita, quin velocitas mobilis descendens per AC sit perpetuo dupla velocitatis ejusdem mobilis descendens per AB .

Ad puncta omologa linearum recurrere non dubitavit Clariss. Frater tuus, atque per ista puncta demonstrationem conficere, quæ tam valida prima fronte videri potest, ut nil mirum quod in errorem inducere potuerit per aliquod temporis spatium tuum ipsum Cl. Fratrem. In opusculo ergo jam citato, lineas ipsas AC , DE in partes infinite minimas divisas concipit; atque ex eo quod quælibet minima portio Cm sit ad En uti $2:1$; & sic similiter $Am:Dn = 2:1$; concludit, spatiolum Cm duplum En , dupla velocitate, æquali tempore percurri debere. Cum ergo de omnibus omologis spatiolis idem verificetur; concludendum esse putavit lineas AC , & DE æquali tempore percurri debere; adeoque in secunda medietate lineæ ipsius AC , motum esse instantaneum.

Allatæ rationis paralogismum ipsemet Frater tuus in citata epistola ita clarissime exponit. Libenter tibi ultro concedo spatiola omnia mC , $2mn$, &c. percurri eo tempore quò percurruntur spatiola analogæ En , $2nn$, &c.

dum-

dummodo excipias prima Aim , Din . Hisce primis aptari non potest ratio, quæ valet in aliis omnibus, Etenim quum in punctis m , n velocitates finitæ sint, & earum incrementa per minimas mC , nE infinitesima; licet, ut cuique notum est, supponere corpora per Elementa mC , nE æquabili motu cieri, at in primis Elementis Aim , Din velocitates in punctis A , D nullæ sunt; in punctis im , in , sunt aliquæ quidem certe.

Vellem hic mecum sentires, aliud esse demonstrare motum instantaneum; & aliud hypothesis falsitatem cum experientia in hypothesis celeritatum crescentium in ratione spatiorum. Fratris tui allata ratio demonstrat quidem, motum instantaneum non dari per lineas AC , DE ; verum hoc non tollit falsitatem hypothesis celeritatum crescentium in ratione spatiorum; nam si, consentiente ipsomet Fratre tuo, omnia spatia analogæ, excepto primo spatiolo, æquali tempore percurruntur; jam cum, experientia teste, differentia temporum inter inE ; post spatiolum percursum Din ; atque integram DE sit evanescens; & sic similiter evanescens sit differentia inter imC ; post percursum Aim ; atque integram AC ; jam sequitur, differentiam quoque temporum inter DE & AC esse quoque evanescentem; quod experientiæ quidem repugnat. Ex eo quod etiam omnia spatia analogæ æquali tempore percurrantur excepto primo, supervacaneum erit tibi acutissimo viro ostendere, corpora post percursum spatiorum Aim , Din in quacunque ratione finita, vel infinita inter se; debere

æquali tempore percurrere spatia imC , inE , quæ sint uti percurfa spatiola Aim , Din : quæ quidem cum experientia manifeste pugnant.

Hæc adnotanda mihi erant; clarissimus siquidem epistolæ auctor Fratris tui argumentum contra metipsam theoriam Galileanam retorqueri posse putat; quod quidem mea sententia potius ipsam Galileanam legem, accelerationis, nempe ratione temporum, confirmat. Si enim, inquit, laudatus Auctor, velocitates sunt uti tempora; in fine C (Fig: 1.) secundi temporis, velocitas mobilis D dupla erit velocitatis mobilis A in fine primi temporis E ; dividendo ergo in tempuscula minima secundum tempus BC , ac primum DE : velocitas A in quolibet puncto m temporis BC dupla erit velocitatis D in puncto correspondenti n temporis DE : adeoque integro tempore BC velocitas A dupla erit velocitatis D per integrum tempus DE . Cum autem in m , & n velocitates finitæ sint, & incrementa infinitesima; hinc tempusculo $mC = nE$; A , dupla velocitate duplum debet percurrere spatium; adeoque integro secundo tempore BC ; A , duplum debet spatium percurrere; quod quidem Theoriæ Galileanæ contrarium est; siquidem tempore secundo non duplum, sed triplum debet spatium grave percurrere. Facile autem est disparitatem adducere; nam dividendo tempora æqualia BC & DE in tempuscula minima, falsum est velocitatem A in quolibet puncto temporis BC duplam esse velocitatis D in puncto correspondenti temporis DE . Adeo verum est

argu-

argumentum retorqueri non posse ; ita ut , salva paritate , Galileana potius confirmetur Theoria . Et quidem , ut supra factum est , integra AC & DE dividantur in partes infinite minimas , erit quodlibet tempusculum $Cm : En = 2 : 1$, & cum in puncto m dupla sit velocitas , tempusculo duplo mC quadruplum spatium percurratur necesse erit . Jam vero ipsa ratiocinatio in tempusculis correspondentibus institui potest ; ergo integro duplo tempore AC, quadruplum percurri debet spatium , uti postulat Theoria Galileana .

Videamus jam modo, utrum Fermatius in hujusmodi disquisitione meliori via procedat . In epistola ad Gassendum Tom.vi. ita rem conficere putat . *Intelligatur motus gravium descendantium a quiete ex puncto A (Fig.2.) usque ad punctum H , verbi gratia , & supponatur, si fieri potest, velocitatem gravis cadentis accelerari juxta rationem spatiorum decurforum . Ponatur motus jam factus ab A usque ad H tempore unius minuti ; aut altero quovis tempore determinato , & supponatur motus continuari usque ad punctum K . Ajo motum per HK fieri in instanti . Si enim motus per HK non fiat in instanti , fiet in tempore aliquo determinato , quod per aliquem numerum multiplicatum excedet tempus in decursu spatii AH insumptum . Ponatur numerus multiplicans 5 : ita ut tempus motus per HK quinquies sumptum excedat tempus motus per AH . Rectis KA , HA sumatur tertia proportionalis GA, & toties continuetur proportionalium series, donec spatiorum interceptorum nume-*

rus excedat numerum quinque . Fiant ergo ex proportionalibus continuatis sex , verbi gratia , spatia ultra punctum H , quæ sint HG , GF , FE , ED , DC , CB . Ergo tempus motus per HG per præcedentem est æquale tempori motus per HK . Similiter tempus motus per GF , est æquale tempori motus per HK . Denique motus per totam HB fiet in tempore , quod ad tempus per HK erit sextuplum . At tempus , temporis per HK quintuplum , est majus tempore motus per AH . Ergo a fortiori tempus motus per HB tempore motus per totam HA est majus : quod est absurdum . Ergo vera remanet Galilei illatio , quamvis eam ipse non demonstraverit .

Histec Fermatii demonstratio supponit , uti vides , continuas proportionales KH , HG , GF , FE , ED , DC , CB , æquali tempore percurri in data hypothese . Fermatius demonstrat quidem more veterum tempus per HK non esse majus, nec minus tempore per HG ; ex quo concludit , tempora esse æqualia : verum cum ejus demonstratio ob longinquitatem tedio sit plena , liceat mihi breviter , & directe hoc idem ostendere . Sint ergo KA , HA , GA , FA , EA , DA , CA , BA , continue proportionales , erunt jam , uti Geometria ostendit , continue proportionales lineæ KH , HG , GF , FE , ED , DC , CB , atque in ipsa ratione inter se , ac sunt superiores . Cum celeritates ex hypothese sint uti spatia , erit linea recta AQ , linea celeritatum . Dividantur KH , HG , in partes infinite minimas uti Gc , Ho ; erit jam $Ho : Gc = HK : HG = KA : HA = HA : GA$: sed celeritas in G ad

ce-

celeritatem in H uti $GL : HO = GA : HA$: ergo, cum motus per infinitesimas Gc & Ho pro uniformi haberi possit, erunt tempora in ratione composita ex directa spatiorum, & inversa velocitatum : sed ratio directa spatiorum ex dem: est $HA : GA$, & inversa velocitatum, $GA : HA$: ergo tempus per Ho æquatur tempori per Gc ; sed hoc idem demonstrari potest in omnibus spatiis correspondentibus : ergo tempus per integram HK æquatur tempori per GH.

Exposita Fermatii demonstratione quæ a Cl. Fratretuo, & ab omnibus Mathematicis summis laudibus celebratur, dicam fidenter, ipsam, uti illam supra expositam, demonstrare hypothesim accelerationis in ratione spatiorum locum non habere in natura ; sed non demonstrare juxta mentem Galileanam, in data hypothesi, dari motum instantaneum. Et quidem cum ex experientia, linea finita HK, post percursum AH, tempore finito percurratur: hinc; cum ex demonstratis a Fermatio, tempus per HK sit æquale tempori per HG, per GF &c. usque ad infinitum ; supposita experientia, hypothesi accelerationis in ratione spatiorum locum habere nequit in natura, in qua motus per HA finito tempore conficitur. Verum facile animadvertes, Fermatium male concludere motum instantaneum per HK in data hypothesi accelerationis. Nam primo supponendo motum per HK finitum, absurdum deducit, nempe tempus per HB majus tempore motus per HA ; sed non erat deinde statim deducendum, motum per HK esse instantaneum : videndum

enim erat utrum in tali hypothesi tempus per HK possibile esset, vel infinite parvum, vel infinite magnum; atque primi, & secundi casus demonstrata impossibilitate, tunc legitima fuisset conclusio: ergo motus per HK in data hypothesi erit instantaneus. Facile certe conficitur in data hypothesi accelerationis, non modo repugnantia motus per HK tempore infinite parvo, vel infinite magno, sed necessitas temporis finiti. Cum enim in data hypothesi, percurso spatio finito, finita acquiratur velocitas: jam in H finita erit velocitas; atque cum sit velocitas in H, ad velocitatem in K uti $AH : AK$; jam in K finita quoque erit velocitas: sed velocitate finita, spatium finitum, tempore finito, percurritur motu uniformi; ergo velocitate in H acquisita, motu uniformi, tempore finito, spatium finitum HK percurri debet; & sic similiter motu uniformi celeritate in K acquisita, spatium idem HK tempore finito percurri debet: jam vero tempus motus accelerati per HK, in data hypothesi, est minus tempore motus uniformis per HK velocitate in H acquisita: quia in omnibus punctis spatii HK velocitas crescit; & tempus ipsius motus accelerati per ipsam HK, est minus tempore motus uniformis per HK velocitate in K acquisita: quia in omnibus punctis spatii HK velocitas est minor, quam sit in K: ergo tempus motus accelerati per HK est finitum. Communis est opinio, Fermatium demonstrasse, in hypothesi accelerationis in ratione spatiorum, infinito opus esse tempore ut finitum spatium percurratur. Primus quod sciam, qui hoc de

Fer-

Fermatio asserat est Gastonus Pardies in præfatione ad suam Staticam. Stricte autem loquendo ex demonstratione Fermatii deducitur tempus infinitum per AK, quando prius demonstratum sit in dicta hypothesi tempus per HK esse necessario finitum; quæ quidem res demonstratu facilis est, at a Fermatio nedum verbis indicata. Primus autem qui clare demonstraverit tempore infinito opus esse per AK, in dicta hypothesi, est certe Ermannus in sua Foronomia. Cl: autem Frater tuus hoc idem diversa methodo demonstrat in citato opusculo.

Sed jam hic, vir clarissime, oritur difficultas. Si hypothesis celeritatum in ratione spatiorum exigit necessario tempus finitum per HK, quo modo ergo absurdum Fermatius ex hac suppositione deducit? Fermatius absurdum deducit quia falsum supponit in data hypothesi; & quidem falsum est tempus finitum per HK multiplicatum numero quolibet finito, superare tempus per AH in data hypothesi celeritatum. Cum enim linea velocitatum sit linea recta; si ergo ex punctis K, H, G, &c. ducantur normales quæ sint in ratione inversa linearum, quæ possunt areas AKQ, AHO, AGL &c., atque inde curva dMNP resultet: jam ex Newtono (Princ: lib: 1. Pro. 39.) areæ AbdPK, AbdNH, &c. representare debent tempora per AK & AH in data hypothesi velocitatum. Jam vero cum areæ AKQ, AHO, AGL, sint triangu-
 gula similia, erunt uti KQ^2 , HO^2 , GL^2 , &c. ergo semior-
 dinatæ KP, HN, GM, &c. sunt uti $\frac{1}{KQ}$, $\frac{1}{HO}$, $\frac{1}{GL}$ sive
 uti $\frac{1}{KA}$, $\frac{1}{HA}$, $\frac{1}{GA}$: ergo linea curva dMP erit Hyper-
 bola

bola Apolloniana intra asymptotos AK , Ab : ergo cum area $AbdMNH$ sit infinita, tempus per AH erit infinitum: falsum ergo quod in data hypothesisi velocitatum tempus finitum per HK multiplicatum per numerum finitum possit superare tempus per AH in dicta hypothesisi.

Istec Newtoniana doctrina primum a Fratre tuo adhibita est, atque mirifice consentit cum demonstratione Fermatii juxta quam tempora per KH , HG &c. sunt æqualia; cum enim KA , HA , GA , &c. sint continue proportionales in ipsa ratione ac lineæ KH , HG , GF , &c. inutile erit, tibi acutissimo viro ostendere, areas $HNPk$, $GMNH$ &c. esse æquales inter se,

In hac re dissimulandum non est, quod si jam ex experientia supponatur tempus per AH finitum, atque simul quoque supponantur velocitates crescere in ratione spatiorum, tum his duabus manentibus suppositionibus, facile erit ostendere, motum instantaneum per HK . Cum enim ex hypothesisi celeritatum in ratione spatiorum; in H finita sit velocitas; & sic similiter finita in K ; jam HK percurri nequit tempore infinito, nec infinite parvo uti supra jam demonstravi. Si autem tempus per HK dicatur finitum; tunc cum finitum ex altera suppositione sit tempus per AH , jam verificatur, tempus finitum per HK multiplicatum aliquo finito numero superare debere tempus finitum per AH : adeoque verificatur absurdum a Fermatio demonstratum: tempus nempe per BH majus tempore per AH . Cum manentibus duabus suppositionibus, motus per HK , nec infinite parvo, nec

nec infinito , nec finito tempore fieri possit , fiet ergo in instanti .

Forſan aliquis hic objicere poſſet, Fermatium, in ſuppoſitione quod motus gravium , ex experientia , tempore finito fiat per AH , demonſtrare motum iſtantiſimum per HK. Verum ſi res ita ſe habet, non demonſtrat Fermatius juxta mentem Galileanā motum iſtantiſimum adeoque concludere nequit, ut ipſe facit . *Ergo vera remanet Galilei illatio, quamvis eam ipſe non demonſtraverit.* Galileus intelligit dari motum iſtantiſimum in hypotheſi celeritatum creſcentium in ratione ſpatiorum percursorum , nulla alia ſimul facta ſuppoſitione , ab experientia corporum deciduorum in natura deſumpta . Revera Galilei demonſtratio ſupra allata hypotheſim in ſe conſiderat , nulla habita relatione cum experientia , atque ex mera hypotheſis conſideratione motum iſtantiſimum deducit . Mentem Galileanā Gaſſendus bene aſſecutus eſt , adeoque, uti ſupra vidimus, nititur & ipſe oſtendere motum iſtantiſimum in hypotheſi accelerationis in ratione ſpatiorum , abſque ulla ſuppoſitione experientiæ deſumptæ a corporibus naturaliter deciduis .

Sed jam veniam ad demonſtrationem a Clariffimo Andres expoſitam . Cum velocitates ſint uti ſpatia ; ſi ponatur (Fi: 2.) $AK : AH = 2 : 1$ jam dupla erit velocitas in K ; adeoque grave in K motu uniformi velocitate in K acquiſita percurreret $2AK$, eo ipſo tempore , ac in H velocitate acquiſita in ipſo puncto H motu uniformi percurreret $2AH$. Sed tempus , quo grave

motu accelerato percurrit AK, æquatur tempori, quo motu uniformi, velocitate in K acquisita, percurreret $2AK$; & similiter tempus quo grave motu accelerato percurrit AH, æquatur tempori quo motu uniformi velocitate in H acquisita percurreret $2AH$; ergo tempus motus accelerati per AH, æquatur tempori motus accelerati per AK; ergo HK in instanti percurritur.

Hic jam revocanda sunt, quæ supra sunt quoque observata. Galileum nempe sua demonstratione conficere velle in hypothefi celeritatum crescentium in ratione spatiorum, nullo abito respectu ad corpora per gravitatem decidua, dari motum instantaneum. Patet dictum: in demonstratione siquidem Galilei nulla, ne verbo quidem, fit mentio circa legem aliquam ab experientia desumptam, cum qua comparando hypothefim celeritatum crescentium in ratione spatiorum sequatur inde motus instantaneus. Patet etiam dictum; ita enim Salviatum loquentem inducit Galileus. *Per ora basta al nostro Autore, che noi intendiamo, che egli ci vuole investigare e dimostrare alcune passioni di un moto accelerato (qualunque si sia la causa della sua accelerazione) talmente che i movimenti della sua velocità vadano accrescendosi dopo la sua partita dalla quiete con quella semplicissima proporzione, colla quale cresce la continuazione del tempo, che è quanto dire, che in tempi eguali si facciano eguali additamenti di velocità. E se si incontrerà, che gli accidenti che poi saranno dimostrati si verifichino nel moto de' gravi naturalmente*
de-

*descendenti ed accelerati , potremo reputare che l' as-
sunta definizione comprenda cotal moto de gravi , e che
vero sia , che l' accelerazione loro vada crescendo secon-
do che cresce il tempo e la durazione del moto . Statim
deinde subjungit Sagredus . Per quanto per ora mi si
rappresenta all' intelletto , mi pare , che con chiazze-
za forse maggiore si fosse potuto definire senza variar il
concetto : moto uniformemente accelerato esser quello ,
nel quale la velocità andasse crescendo secondo che cresce
lo spazio , che si va passando .*

Salviati verba manifeste demonstrant , Galileum con-
siderare velle affectiones cujusdam motus accelerati ju-
xta legem aliquam non repugnantem , nullo habito re-
spectu ad corpora per gravitatem naturalem decidua .
Unam accelerati motus per Salviatum definitionem ex-
ponit , alteram per Sagredum , neque inquirere vult ,
utrum una vel altera conveniat experientiae ; sed tan-
tum affectiones potius in prima definitione quam in se-
cunda inquirat , quia per ipsum Salviatum impossibilem
dicit Sagredi definitionem . Impossibilitas ergo enun-
ciata, atque per motum instantaneum demonstrata non est
impossibilitas respectu experientiae , de qua nullus ser-
mo in demonstratione , sed est impossibilitas ipsius defi-
nitionis ; nam si sensus verborum perpendatur ipsa im-
possibilitas est ratio cur affectiones motus juxta Sagredi
definitionem non inquirat . His observatis in demonstra-
tione exposita supponitur jam hypothesis celeritatum in
ratione spatiorum ; deinde supponuntur corpora in fine
spa-

spatii alicujus AH in H tantam acquirere velocitatem , ut ipso tempore ; quo motu accelerato percurritur AH , motu æquabili velocitate in H acquisita possint duplum spatium AH percurrere ; sed hoc falsum est in hypothesi accelerationis in ratione spatiorum ; sed necessarie verum juxta legem Galileanam , accelerationis nempe in ratione temporum . Verum ergo est , supposita lege Galileana accelerationis , atque supposita hypothesi accelerationis in ratione spatiorum , sequi motum instantaneum per HK : sed hoc non est vindicare demonstrationem Galileanam a Paralogismo ; sed rem plane diversam demonstrare . Si ergo per Sagredum motus acceleratus esset ille , in quo velocitates essent uti spatia simul , & uti tempora , tunc demonstratio locum habere posset . Verum Sagredi definitio talis non est ; & nimis ista materialis fuisset ; quis enim statim non videt , tali definitione supposita , in motu uniformiter accelerato spatia esse debere uti tempora ? quod motui uniformiter accelerato repugnat . Quin imo nec talem supponere possumus Sagredi definitionem ; Galileus siquidem motum instantaneum demonstrando , ne verbo quidem nominat definitionem per Salviatum expositam ; nec aliquid in demonstratione usurpat quod ex Salviati definitione promanare possit ; unde nec possumus concipere Galileum in sua demonstratione supponere gravia in fine descensus tantam acquirere velocitatem , ut motu uniformi , ipso tempore , duplum spatium possint percurrere , tanto magis etiam , quod hoc theorema de-

demonstrat deinde, atque demonstrationem desumit a Salviati definitione, juxta quam celeritates sunt uti tempora . Atque ut hoc manifeste constet ; (Pag.95.), uti ab initio diximus , demonstrationem instantanei motus assignat; pag. autem (98.) theorema hoc exponit. *Tempus in quo aliquod spatium a mobili conficitur latione ex quiete uniformiter accelerata , est æquale tempori , in quo idem spatium conficeretur ab eodem mobili motu æquabili delato , cujus velocitatis gradus subduplus sit ad summum , & ultimum gradum velocitatis prioris motus uniformiter accelerati .* Patet ergo manifestissime , Galileum in demonstratione motus instantanei supponere non potuisse id, quod nondum demonstraverat. Sed dicam ultra. Jam supponi nequeunt gravia in fine descensus tantam acquirere velocitatem , ut possint æquali tempore duplum spatium percurrere æquabili motu ; quin & simul supponamus, velocitates esse uti tempora . Ista facta suppositione ; & manente simul altera suppositione : uti Cl: Andres facit in sua demonstratione , velocitatum nempe crescentium in ratione spatiorum , dico potius ex his duabus suppositionibus dari simul , & non dari motum instantaneum per lineam HK . Ex suppositione velocitatum in ratione temporum , sequitur necessario tantam acquirere debere mobile in fine descensus velocitatem , ut motu uniformi , acquisita velocitate , æquali tempore possit duplum spatium conficere . Ex hoc autem , atque ex suppositione quod velocitates sint uti spatia ; sequitur , uti optime demonstrat Clarissimus Andres , motus instantaneus

instantaneus. Cum autem velocitates sint uti spatia, juxta unam suppositionem, & juxta alteram sint uti tempora quibus spatia conficiuntur; hinc cum sit spatium $AH : AK = 1 : 2$; erit velocitas in H ad velocitatem in K uti $1 : 2$ per primam suppositionem; atque tempus per AH ad tempus per AK uti $1 : 2$ per secundam suppositionem: ergo motus per HK fit in tempore.

Ex argumentis prolatis unusquisque conjicere potest, impossibile esse a paralogismo demonstrationem Galileanam vindicare: neque hoc gloriam incomparabili Galileo imminuere potest; suos enim quandoque manes summus Newtonus passus est, pati ergo potuit & suos Galileus. Sed jam desinens, quæso obtestorque humanitatem tuam, ut quid de hoc sentias, ad me scribere ne graveris, & tibi ita plane persuadeas, me non tantum mihi tribuere, ut nullo pacto errare me potuisse credam. Vale & fave.

Romæ X. Kal. Octob. CIOCCCLXXIX.

IMPRIMATUR

Si videbitur Reverend. P. Mag. Sac. Palatii
Apostolici .

*F. A. Marcucci ab I. C. Episcopus
Montis-Alti , ac Vicesg.*

IMPRIMATUR

F. Pius Thomas Schiara Ord. Præd. Sacri
Palatii Apostolici Magister .



